

山家清事  
宣政雜錄  
碧湖雜記

清尊錄  
續墨客揮犀  
大唐傳載



續  
墨  
客  
揮  
犀

撰人不詳

中  
華  
書  
局

叢書集成初編

山家清事（及其他五種）

中華書局出版發行

（北京王府井大街三十六號）

秦皇島市資料印刷廠印刷

一九九一年北京第一版

開本：七八七乘一〇九二毫米三十二分之一

統一書號：ISBN 7-101-00894-1/K·367

續墨客揮犀

此據古今說海本  
排印初編各叢書  
僅有此本

## 續墨客揮犀

石曼卿善豪飲。與布衣劉潛爲友。嘗通判海州。劉潛來訪之。曼卿與劇飲。中夜酒欲竭。顧船中有醋斗餘。乃傾入酒中。併飲之。至明日。酒醋俱盡。每與客痛飲。露髮跣足。著械而坐。謂之囚飲。飲于木杪。謂之巢飲。以藁束之。引首出飲。復就束。謂之繫飲。其狂縱大率如此。麻後爲一菴。常過其間。名之曰捫虱菴。未嘗一日不醉。仁宗惜其才。常對輔臣言。欲其戒酒延年。曼卿聞之。因不飲。遂成疾而卒。

劉潛以淄州職官。權知鄆州平陰縣事。一日與客飲驛亭。左右忽報太夫人暴疾。潛馳歸。已不救矣。潛抱母一慟而絕。其妻見潛死。撫潛屍大號而卒。時人傷之曰。子死于孝。妻死于義。孝義之事。併集其家。鄆陽龔冕。自言其祖紀與族人同應進士舉。唱名日。其家衆妖競作。牝雞或晨啼。犬或巾幘而行。鼠或白晝羣出。至於器皿服用之物。悉自變易其常處。家人驚懼。不知所爲。乃召女巫徐姥者。使治之。時尙寒。與姥對爐而坐。有一貓正臥其側。家人指貓與姥曰。吾家百物皆爲異。不爲異者。獨此貓耳。於是貓亦人立。拱手而言曰。不敢。姥大駭。馳去。後數日。捷音至。二子皆高第矣。知妖異未必盡爲禍也。

華嶽張超谷。巖石下有僵尸。齒髮皆完。春時遊人多以酒漚口中。呼爲臥仙。好事者作木榻以薦之。嘉祐中有石方十餘丈。自上而下。正塞巖口。豈非仙者所蛻。山靈護之。不欲人之褻慢邪。閩嶺已南。多木綿。土人競植之。採其花爲布。號吉貝。余後因讀南史。海南諸國傳。言林邑等國出古貝木。

其華成對如鵝毳。抽其緒紡之以作布。與苧不異。亦染成五色。織爲斑布。正此種也。蓋俗呼古爲吉耳。歐陽詩話有譏唐人半夜鐘聲到客船之句云。半夜非鐘鳴時。或謂人之始死者則必鳴鐘。多至數百千下。不復有晝夜之拘。俗號無常鐘。疑詩人偶聞此耳。余後過姑蘇宿一院。夜半偶聞鐘聲。因問寺僧。皆曰。固有分夜鐘。曷足怪乎。尋聞他寺皆鳴。始知半夜鐘惟姑蘇有之。詩人信不謬也。

梁灝八十二歲。雍熙二年狀元及第。其謝啓云。白首窮經。少伏生之八歲。青雲得路。多太公之二年。後終祕書監。年九十餘。

延平吳氏姊妹六人。皆妬悍殘忍。時號六虎。就中五虎尤甚。凡三適人。皆不終。平生手殺婢十餘人。每至夜分。常開堂廡。聞喧呼擊扑之聲。同室者皆懼。五虎怒曰。何鬼敢爾。命開戶移榻於中庭。持刀獨寢。徹旦寂然。人謂五虎之威。鬼猶畏之也。

守宮其形大槩類蜥蜴。足短而加闊。亦有金色者。秦始皇時。有人進之。云能守鑰。人不敢竊發鑰。故名之曰守宮。由此也。又云。致于宮中。宮人之有異志者。卽吐血汚其衣。或曰。以守宮繫宮人臂。守宮吐血汚臂者。有淫心也。秦皇則殺之。

長安故宮闕前有唐肺石尚在。其制如佛寺所繫響石而甚大。可長八九尺。形如人肺。亦有款志。但漫剝不可讀。秋官大司寇。以肺石達窮民。原其義。乃伸冤者擊之。立其下。就士師聽辭。如今之揭登聞鼓也。所以肺形者。便於垂。又肺主聲。聲所以達其冤也。

張杲卿丞相知潤州日。有婦人夫出。經數日不歸。忽有人報菜園井中有死人。婦人驚往視之。號哭曰。吾夫也。遂以聞官。公命屬官集鄰里就井驗。是其夫與非。衆皆以井深不可辨。請出屍驗之。公曰。衆皆不能辨。婦人獨何以知其夫。收付所司鞫問。果姦人殺夫。婦人與其謀。

漁家以獼猴毛置之網四角。則多得魚。云魚見之。如人之見錦繡也。今有見人於江湖溪沼間。垂釣布網者。但至心默倒誦揭諦呪一七遍。則可使終日無獲。湘潭間有李道人。常持此呪以濟物命。後爲羣漁所仇。乃越境而遁。

北方有白鴈。似鴈而小。色白。秋深則來。白鴈至則霜降。河北人謂之霜信。杜甫詩云。故國霜前白鴈來。卽此也。

夜甌飲食器中。覆之不密。鼠聞其氣。欲盜食而不可得。則環器而走。涎滴器中。食之者得黃疾。通身如蠟。鍼藥所不能療也。

李庭彥獻百韻詩于一上官。其間有句云。舍弟江南沒。家兄塞北亡。上官惕然傷之。曰。不意君家凶禍重。併如此。庭彥遽起自解曰。實無此事。但圖對屬親切耳。

許義方之妻劉。以端潔自許。義方嘗出。經年始歸。謂其妻曰。獨處無聊。得無時與鄰里親戚往還乎。劉曰。自君之出。惟閉門自守。足未嘗履闕。義方咨歎不已。又問何以自娛。答曰。惟時作小詩以適情耳。義方欣然。就命取詩觀之。開卷第一篇題云。月夜招鄰僧閒話。

東漢人無復名者。或以問鄉貢進士方絢。絢云。王莽時禁用兩字名。蓋沿襲所致。

處士劉易隱居王屋山。嘗於齋中見一大蜂。冒于蛛網。爲蜂螫墜地。俄頃蛛鼓腹欲裂。徐徐行入草。嚙芋梗微破。以瘡就嚙處磨之。良久腹漸消。輕捷如故。自後人有爲蜂螫者。授芋梗傅之則愈。

王舜求云。蒿菜出髑國。有毒。百虫不近。蛇虺過其下。觸之則目瞑不見物。人有中其毒者。唯生薑汁解之。謝正秀才云。有人食黃鰱魚。後食荊芥湯。卽時死。後見醫者云。二物極相反。食他魚亦宜禁之。



